

# LA QUOTIDIANA

FMR Fundaziun Medias Rumantschas, Via da Masans 2, 7000 Cuirra, 081 544 89 11, redacziun@fmr.ch



## Il nov pumtrack a Glion

Sonda ha la populaziun da Ilanz/ Glion festiva l'avertura dal pumtrack a Glion-Fontanivas realisà da l'uniun «a Glion» e da la vischnanca. **Pagina 2**



## Ideas pel svilup da Lavin

Var 30 abitantas ed abitants da Lavin han participà ad ina sairada da dialog per ponderar ideas e giavischs per il svilup da la vischnanca. **Pagina 7**

FMR FUNDAZIUN  
MEDIAS  
RUMANTSCHAS

südostschweiz

## GRISCHUN CENTRAL

### Brinzauls è puspè pli periclità

Il venderdi passà han il stab directiv da la vischnanca Albula/Alvra e la squadra da geologs puspè stuì dar alarm. Per il vitg da Brinzauls è il nivel da privel puspè vegnì auzà en la fasa cotschna. La raschun: I dat ina zona delicata – numnada «plateau ost» che periclitoscha la fracziun evacuada. En il mender cas pussaivel, pudess ina bova perfin devastar tut las chasas da Brinzauls. (fmr/dat) **Pagina 8**

## SURSELVA

### 100 onns automobil el Grischun a Glion

Il davos venderdis sera ha igl Institut per la perscrutaziun da la cultura grischuna (IKG) presentau il cudisch cull'istoria digl'automobil el Grischun a Glion. La vernissascha dil cudisch ha giu liug ella vegliuorda garascha Fontana el center da Glion. *Simon Bundi*, historicher e curatur d'in museum d'autos a Turitg ed autur responsabel dil cudisch ha presentau entgens schatgs dil cudisch a caschun dall'avertura. En maletg e film ei vegniu presentau numerus exempels co igl auto ha fatg ragischs el Grischun. Agl ur dalla vernissascha ha el era numnau entgens fatgs interessants dil svilup digl'automobil en Surselva. (fmr/mg) **Pagina 5**

## GRISCHUN CENTRAL

### Il pli aut pumpier svizzer è in Grischun

A Baden (AG) ha gi lieu sonda passada la radunanza da delegads da la Federaziun svizra dals pumpiers. Per il Grischun è quella reuniun stada in di istoric. La raschun: Cun *Roland Farrér* da Stierva è per l'emprima giada vegnì elegì in Grischun sco president da l'organisaziun svizra che unescha radund 80 000 pumpiers en il pajais. Roland Farrér, da professiun pur ed actualmain anc president dals pumpiers grischuns, suonda a *Laurent Wehrli* ch'è stà 21 onns al timun da la federaziun svizra. Giast da la radunanza da delegadas e delegads è era stà il cusseglier federal *Martin Pfister*. Al nov president dals pumpiers svizzers ha el ditg: «Grazia fitg che vos surpigliais quest uffizi.» (fmr/gns) **Pagina 8**

## ENGIADINA

### La balantscha i'l provedimaint da sandà



L'ospidal dal Center da sandà Engiadina Bassa – ün exampel eir per oters ospidals chi han da cumbatter? FOTO MICHAEL STEINER

L'ospidal dal Center da sandà Engiadina Bassa (CSEB) a Scuol es üna da las pacas instituziuns da sandà i'l Grischun chi's tegna fin uossa magari bain sur aua e nu cumbatta cun difficultats finanzialas in dimensiuns sco oters ospidals perifers. I'l intervista quinta il schefmeidi da la medicina interna al CSEB *Marek Nemeš* co ch'el e sia squadra agischan per spordscher ün provedimaint uschè vast sco pussibel cun pussibilitats limitadas, che chi sun ils avantags dals ospidals perifers e che importanza cha la col-lavuraziun cun otras instituziuns da sandà ha pel provedimaint regional. (fmr/mst) **Pagina 7**



## Gist pliras premieras hai dà a Turitg

La fin d'emna da las premieras rumantschas è passada. Per l'emprima giada hai dà a Turitg in festival cun musica e cultura rumantscha. Per l'emprima giada hai dà ina qualificaziun per ina slamadra rumantscha per sa participar al campinadi svizzer dal poetry slam. E per l'emprima giada en si'istorgia ha la Lia Rumantscha envidà la radunanza generala ordaifer il territori da tschep.

OLIVIA PORTMANN-MOSCA/FMR

La festa rumantscha e cunquai la premiera dal Festivalet è gartegiada. Cun grond gust èn var 700 personas s'inscuntradas la fin d'emna passada a Turitg. Sut il tetg dal X-tra e da la baselgia da Johanness han ils organisaturs dal Festivalet purschi in vast program cultural e musical per giuven e vegl. Perfin vi da la culinaria han ils organisaturs pensà e laschè servir cun plain en pigna ina tipica tratga grischuna.

Per l'emprima giada ha la scena da poetry slam in campinadi svizzer cun participaziun

«Nossa finamira era da porscher a personas rumantschas ed a personas interessadas da la Bassa ina festa.»

Benedetto Vigne, co-iniziant Festivalet

rumantscha. L'Engiadinaisa *Selina Poo* è sa qualificada en occasiun dal Festivalet per quel campinadi, malgrà ina ferma concorrenza, ed ha persvadì il public cun ses texts frestgs.

E per l'emprima giada ha gi lieu la radunanza generala da la Lia Rumantscha ordaifer il territori tradiziunal rumantsch. Era sch'i n'ha anc betg dà bler concret da dir, ha la suprastanza preschentà sia nova strategia. Las delegadas ed ils delegads n'han gi nagut encunter da vegnir fin a Turitg e cumbinar las obligaziuns cun ils plaschairs da l'emprim Festivalet. **Pagina 2 e 3**

«Nus essan anc lunsch davent da quellas ponderaziuns.»

Quai respunda *Christian Gartmann* dal stab directiv da la vischnanca Albula/Alvra sin la dumonda, sch'ins pondereschia forsa perfin da dar si l'infrastructura dal vitg evacuà da Brinzauls. – **Pagina 8**



Servetsch d'abunents e da distribuziun: tel. 0844 226 226  
mail: abo@somedia.ch

9 771424 749004